



KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

17 Mai 2019

11 Ramzaan 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

L'IDENTITÉ DE RAMZAAN

Nous pé vive bane jours et bane la nuite d'ene mois exceptionnel ; ene mois béni ki ena énormément de bane bienfaits et ene opportunité pour sak musulman pour zot saizi zot de sa pou zot capave profite pleinement de sa mois là. Pour ki zot faire sa, li important ki nous conner saki sa mois là symboliser et séki nous capave tirer de sa mois là afin ki nous capave gagne l'amour et le salut d'Allah, et nous gagne sa l'espoir pou ene jour rentre dans paradis, *Insha-Allah*.

Nous bien-aimé prophète Hazrat Muhammad (saws) fine dire – rapporté par Hazrat Abu Huraïra (ra): « *Mois Ramzaan fine vini pou zot ; c'est ene mois béni kot Allah fine impose lors zot le Saum (Roza/ Carême)*. » (Nasäi).

Pour certains musulmans, la venue de mois Ramzaan li pas bien accueillie parski zot bizin prive zot de manzer et boire, ainsi ki pas mal de bane les autres bane plaisirs ki zot ti ena l'habitude pou profiter pendant le reste de l'année. Toutefois, pour ene vrai croyant, Ramzaan li veut en d'autres mots dire faveur d'Allah parski sa mois là, li :

(1) LE MOIS DE LA VICTOIRE.

Le Ramzaan li le symbole de la victoire de l'Islam et de bane musulmans parski c'est pendant sa mois là ki fine ena le premier grand bataille de l'Islam, à Badr, pendant le 17^{ème} Ramzaan dans deuxième l'année Hijri (l'an 2 AH). Sa ti ene bataille ki ti livrer entre le Saint Prophète Muhammad (saws) – ki ti accompagné de 313 croyants – et bane non-croyants de la Mecque et kot c'est bane musulmans ki fine remporte la victoire. C'est pendant sa mois là ki Allah enchaîne nous pire l'ennemi, Shaytaan, afin ki sak dimoune capave gagne la victoire lor li.

Le Saint Prophète Muhammad (saws) fine dire : « *Dans premier la nuite de Ramzaan, tous bane Shaytaan, tous bane Jinns zot enchaîné. Tous bane la portes de l'enfer zot fermer, aucaine pas ouvert. Tous bane la portes du paradis ouvert, aucaine pas fermer...* » (Tirmidhi).

C'est ene vérité ki nous pas capave rénier ki nous la vie lor sa la terre là li marker avec ene combat perpétuel contre Shaytaan. Shaytaan ti fer serment pou dévier nous de nous Créateur et pou faire nous vine so bane esclaves à travers plusieurs de so bane attractions. Li oulé à tout prix sépare nous d'Allah, le *Rab'ul-Aalameen* et faire nous vine so bane propre esclaves ; li envie ki nous vine bane pantins dans so la main, ki bouger lor so l'ordre et non celui d'Allah. Ce ki fait ki Ramzaan li ene l'occasion pou libère nous de l'esclavage de Shaytaan et pou évite so bane pièges. Si ene dimoune pas réussi gagne le dessus lor li (Shaytaan) pendant le mois sacré de Ramzaan, alor kan eski li penser pou faire li alor? C'est pour sa ki Allah et So Messenger (saws) fine enseigne nous ki à travers bane interdits ki fine imposé pendant le mois sacré de Ramzaan, et à travers nous l'attachement à Allah et à la spiritualité (l'Islam), nous délaisse Shaytaan, nous pas écoute li, nous pas laisse nous influencer par li, et nous empêche li attaque nous.

Alor, ki sanlà pou réussi dans ene tel initiative ? C'est bane vrais croyants ! C'est pour zot ki bane la portes du paradis pou reste ouverts et ki bane la portes de l'enfer pou reste fermer. Allah donne à sakaine d'entre nous, nous chance pou réforme nous, pou ki nous prend le droit chemin et pou reste lor sa droit chemin là. C'est pour sa bane ki prend en considération sa bane conseils et commandements divines là ki Shaytaan pas pou capave réussi influence zot.

(2) LE MOIS DE LA PURIFICATION.

Ramzaan li ene mois pendant lequel nous purifier nous égo [nous « moi »], nous « *Nafs* » primitif (le *Nafs-e-Ammarah*) et nous augmente nous *Taqwa* (piété) afin ki nous améliore nous relation avec nous Créateur. C'est ene relation ki pendant 11 mois nous [bane musulmans] fine alle gâté par nous propre fautes, à travers nous bane actions, et kot alor nous fine attire la colère d'Allah lor nous. Ramzaan li donc ene mois ki nous fine gagner pour cherche la satisfaction, la pitié, le pardon et la bénédiction de nous Créateur.

À travers *Roza*, nous atteindre la piété, nous atteindre le plaisir d'Allah. Ce ki fait ki Ramzaan li meilleure l'occasion pour nous pou prouve à Allah ki malgré nous bane nombreux manquements, malgré nous bane défauts, malgré bane péchés ki nous fine faire et malgré nous bane négligences, nous ena toujours l'amour et la crainte pour Li [Allah] et ki tous les temps nous pou toujours bizin So bonté et So pitié lor nous pour guide nous dans le droit chemin. D'ailleurs, Allah (swt) fine promette ki celui ki garde *Roza* pour Li avec la crainte (*Taqwa*) et ki gagne l'espoir dans So miséricorde, sa dimoune là pou gagne Allah même comme so récompense.

(3) LE MOIS DE LA PATIENCE.

Ramzaan li aussi ene mois ki faire nous gagne la patience. Li enseigne nous couma pou prend patience dans tous bane l'étapes de nous la vie. Nous bien-aimé prophète Hazrat Muhammad (saws) fine dire : « *Le mois de la patience et 3 jours de sak mois zot équivaut garde Roza d'ene façon continuel (Roza pendant ene la vie en entier).* » (Nasaï, Ahmad).

Dans sa Hadith là, le Messenger d'Allah (saws) appelle mois Ramzaan couma le mois de la patience. Sa prouver ki sa mois là li meilleure l'occasion ki nous, en tant ki bane croyants nous gagner pou ki nous développe la patience dans nous afin ki nous reste dans l'obéissance d'Allah, et ki nous capave résister à bane l'attaques de Shaytaan et ki nous réussi maitrise nous dans bane moments de malheur.

Rassoollullah (saws) fine dire : « *Celui qui manzer en étant reconnaissant, gagne même récompense ki celui ki garde Roza et prend patience.* » Dans bane les autres versions, sa Hadith là li dire : « *Celui qui manzer en étant reconnaissant, gagne*

même statut ki celui ki garde Roza et prend patience. » - «... li égale à celui ki garde Roza et prend patience. » (Tirmidhi, Ibn Majah, Ahmad).

D'après sa Hadith là, nous comprend ki *Roza* li ene acte d'*Ibaadat* ki faire nous apprane couma pou gagne la patience, couma pou vine patient.

(4) LE MOIS DU PARDON.

C'est certainement ene faveur d'Allah si nous pé capave encore ene fois sa l'année là garde *Roza* pour Li (Allah) pendant Ramzaan. Nous fine gagne encore l'opportunité pou rapproche nous avec Allah et demande Li pardon pour nous bane fautes et péchés. C'est ene l'occasion en or pour ki nous débarrasse nous de sa fardeau de bane péchés là et nous réprend à zéro pou façonne nous la vie, nous l'âme et nous bane actions et l'intention dans façon ki Allah content. Si ene dimoune li gagne Ramzaan, et li pas réussi purifier li et demande pardon pour so bane péchés et réforme so conduite, alor sa dimoune là so la vie alle dans gaspillage, tout au moins ziska ki li réprend lor li, et réforme so la vie, mais si li pas conne profite de sa bane bénédictions exceptionnelles de mois Ramzaan là, alor li vraiment malheureux pour li.

Le Saint Prophète Muhammad (saws) fine dire : « *Celui ki garde Roza pendant mois Ramzaan avec ene la foi sincère et avec l'espoir pou gagne récompense avec Allah, alor tous so bane péchés passé pou être pardonné.* » (Bukhari).

(5) LE MOIS DE LA PROMOTION.

Ramzaan li aussi le mois pendant lequel bane actes d'*Ibaadat* zot multiplier pour celui ki faire li et à travers sa bane actes d'*Ibaadat* là, sa dimoune là (ki li missié ou madame) li rapproche li avec so Créateur. Bane récompenses de *Roza* li certainement illimité.

Nabi Kareem Hazrat Muhammad (saws) fine dire : « *Tout (bon) action de garçon Adam [c'est-à-dire, bane dimounes] pou multipliée : ene bon action pou vaut dix fois (en récompense) et pou capave même multiplié jusqu'à sept cents fois. Allah dire : « Sauf Roza parski li pou Moi, et c'est Moi ki pou donne récompense pou sa. Li (l'homme) abandonne so désir et so nourriture pour Moi.* » (Muslim).

Avec le Ramzaan, ena aussi le *Laila-tul-Qadr*, ene la nuite pendant lequel nous gagne bane récompenses ki vaut plisse ki 1000 mois de récompenses. Hazrat Anas bin Malik (ra) fine rapporté ki kan Ramzaan fine commencer, Hazrat Muhammad (saws) fine dire : « *Certes, sa mois là fine arrive à zot ; ena là-dans ene la nuite ki meilleure ki mille mois. Celui ki priver de sa, li priver de tout le bien et personne pas priver de so bienfaits excepter celui ki vraiment privé de biens.* » (Ibn Majah).

Alors le Ramzaan li ene mois rempli de bane récompenses de toutes sortes. Ena beaucoup bane dimounes profite de sa mois là pou zot alle fer zot *Umrah* et profite Ramzaan dans sa l'état là. Sa c'est à cause ene Hadith ki Hazrat Muhammad (saws) fine dire : « *Umrah ki accomplie dans mois Ramzaan équivalent à ene Hajj ki accompli avec moi.* » (Bukhari).

(6) LE MOIS DE LA LIBERATION.

Ramzaan li ene mois kot Allah libère So bane serviteurs du feu de l'enfer. Nabi Kareem Hazrat Muhammad (saws) fine dire : « *Pendant mois Ramzaan, Allah libère chaque jour et chaque nuit bane dimounes dépi difé...* » (Ahmad).

Donc, si ene dimoune ena vraiment ene ti la grain la moutarde la crainte (*Taqwa*) dans so lécoeur pour Allah et pour saki Allah fine menace li, c'est-à-dire, l'enfer, alors sa dimoune là bizin à tout prix réforme so conduite et profite au maximum de sa mois là dans recherche le pardon d'Allah et rode vine près avec Li à travers *Namaz, duahs, Zikr* et bane les autres *Ibaadat*, couma *Tilawat-e-Quran*, donne bane pauvres manger, faire beaucoup la charité, donne *Zakaat*, accompli tous bane actes *Farz* et profite pour faire bane actes *Nafils* aussi et faire beaucoup travaux *Deen*. Et par sa bane moyens là, nous pou gagne le pardon d'Allah et nous pou gagne l'entraînement pou reste lor sa bon chemin là pendant le reste de l'année.

Faudé pas ki nous gagne sa mois là, mais nous laisse li passer et pas profite li. Faudé pas ki Ramzaan vine zis ene mois kot pas manger pendant ene certain nombres d'heures. Faudé pas perdi létemps dans bane z'affaires initiales. Beaucoup dimounes touye létemps dans la cuisine et dans dormi ou dans bane les autres activités ki pas bane *Ibaadat* ditout. Alors, l'*Ummah* bizin résaisi li et faire en sorte ki li vivre ene vrai Ramzaan couma Allah et Nabi Kareem Hazrat Muhammad (saws) fine enseigne nous, sinon, ki serti Allah fine donne nous Ramzaan, ki serti

ou pé reste sans manger et sans boire. Allah pas pé guette sa Li ! Li, Li envie ki ou réformer, ki ou gagne ene l'occasion de So part pour ki Li pardonne ou, et ki ou vine près avec Li. C'est ene nouvo chance ki Allah donne tous So bane banda pour ki zot change zot la vie pour le meilleure, et zot reste lor le « *Siratwal Mustaqeem* » (le droit chemin), et ki ou libérer de bane Shaytaan et de zot l'influence lor ou.

(7) LE MOIS DE L'INVOCATION (DOAS).

Ramzaan li aussi ene mois kot Allah accepter bane *duahs* licites en abondances. Pli ou demande Allah et ou ena l'espoir dans Allah ki Li pou exauce ou bane *duahs*, bé définitivement Allah pou exauce ou bane *duahs*.

Nous bien-aimé prophète Hazrat Muhammad (saws) fine dire : « *Suppliez Allah (swt) tout en étant sûr ki ou pou être exaucé, et zot bizin conner ki Allah (swt) pas exauce l'invocation d'ene lécoeur inattentif et ki distré.* » (Tirmidhi).

Et mois Ramzaan, Allah exauce bane *duahs* de So bane *Rozédaar* en grande quantité. D'après Hazrat Abu Hurairah (ra), le Saint Prophète (saws) fine dire: « *Ena trois dimounes ki zot invocation pas refuser : ene gouverneur juste, ene jeûneur (Rozédaar) kan li casse so Roza [à soir] et l'invocation d'ene dimoune ki subir ene injustice.* » (Tirmidhi).

Alors, Ramzaan li ene grand leçon pour nous. Sans nous dévotion, Ramzaan pas ena aucaine identité, et sans Ramzaan nous pas ena droit à ene deuxième chance dans la vie. Ramzaan li englobe le désir d'Allah pou trouve nous comme bane dimounes ki proche de Li, et Li fine établir Ramzaan dans sa but là pou ki Li pardonne nous et mette nous lor le droit chemin. Astaire là si nous, nous pas faire aucaine zéffort, alor mois Ramzaan pou passer sans ki nous fine profite de li couma bizin ; nous laisse passe nous chance pou vine près avec Allah, pour ki Allah pardonne nous et accorde nous So plaisir et So paradis. Pli nous avancer vers Allah dans Ramzaan, pli le paradis pou avancer vers nous. Et pli nous reculer d'Allah pendant sa mois là, pli l'enfer pou rapproche de nous, et nous alle perdi tous bénédictions. Alor, fer bien attention. Pas laisse sa grand chance là passer, et vine pour Allah complètement. Ki Allah aide nous pour gagne Li-même comme récompense pendant sa mois là, et pendant le reste de nous la vie lor sa la terre là. *Insha-Allah, Ameen.*